

## Les vîs Blossy.

Gaston LUCY - Y.J.

Cand onz introt a Bîve, à vnant du Moncê, arivé às Stayis, à pon.ne rèchu du bwès, et jusse à l'ôrîre, on wèyot ène pitite basse mājjon covrue avu du strin . A costé i gn avot in courti, in ptit, da ! Kékes pouyes passint leu timp à grèter s' la vôte et deus gades astint loyîes à l'haye, in pô pus lon ; duvant l'uch, in ptit nwâr tchin ki bawiyot sins arèt.

La mājjon, ki n'avot k' deus places bas et in ptit gurnî dzou l' tèt, c'ére la mājjon des vîs Blossy, des bins braves djins, mê ki n'avint pont d'alure.

Figurèz v' ku la fame inmot t'ostant lêchî les tèchons s' la tâle 3 djoûs à lon ; ile prèfèrot canlter. Du s'costé, l'oume a scrotot yène du pus k'à s' toûr, pisku rin nul ratirot al mājjon.

Bref, dins ène mājjon parèy, les afants nu sârint z èsse alvés ku coume des canvolans. Lu grand-père Blossy l'avot pourtant dit mwintes côps à sa bèle bwêchèle :

- Vous adolminèz d' trop vôs afants, mès vous n' vous z-a rindrez compte ku pus târd !  
Ile n' è nin volu choûter l' vî père, mès on va vèy k'ile è oyu l' timp d' s' à rpanti..

Le père Blossy, ki plot awè adon, dins les 45 a 50 ans, astot compagnon. Anute su in travô, dumwin su èn' ôte. Pou l' moumint, i hawot. Avu 2-3 ôtes parèy à loû, i d'râdint les virées, aratchint les sokètes, pîs ils hawint. Il avint djà fwêt bèl et bin des hotches, mès çt' année là, nin moyin d' les fwêre rusouwer pou les brûler. I pluvot sins arèt et onz ére co ou pluvadje dul Sint Djan. I gn avot min.mes des djoûs k'on n'ârot sù dmèrer à l'uch, si bin k' l' ârmère su voûdot ; on djot adon k'les sèris î intrint avu bramint d'espérance et k'iles à rêchint les larmes às oûys. Lu pluvadje è dèrè 3 smwin.nes, pîs il è tapé dju et lâdje pou l'hawadje. On n' è rpris k' bin pus târd, après l'awousse, si bin k'i gnè câsu nin yu moyin d' brûler les fournês, çut année là, amon les Blossy. I n'ont wère samé d' swâye, pourtant gn avot 11 djins à rapachî.

A l'iviêr, i s'avot ambôché avu les fâdeus pou brûler les boûles et pwârter les çades al vèrrie du Charleville. Il a n'avot arivé ène bèle à s' père, alèz, à-z î alant.

Pîs, al froye, ou mwès d' fèvrî-mars, il alot às gurnouyes pou les vinde às cocassîs k' alint à France.

Cand i djalot à l'iviêr, s' i gn avot des fayînes, il alint à bande z-à ramasser et les lîjî avu l'djale volant, pou les vinde âs molins a wîle, mês les années n'astint nin toudi bounes.

Si on dmandot l' âdje âs vîs, i ruspondint souvint : « Dj' sus d' l'anée des fayînes .Ça vlot tout dire !

Ène année k'îls avint sté ou Djumê, les oumes du Bouyon lez î ont vnu fwêre voûdî al tère, pîs i lz ont rtchessî et il ont râflé toutes les fayînes.

A l'iviêr, lu père Blossy alot ou bwês kêre des cârîs pou fwêre des rêspes, des panîs, des volètes, des tchètours des curtains et des ramons. I vindot ses ramons à 2 sous et les panîs à 25, mês i rvintot rarmint avu 5 francs al mājon ou dbout dul djoûrnée. Il avot ène tchèrète avu 2 tchins.

In djoû, al campagne, i sîot in bî. Mês les tchins avint sè. Il ont bratchî ou bî avu la tchèrète et l' père Blossy, k'è sté trimpé coume in canard. I n' è pus yu k' à su rsouwer.

Al râyin.ne âs cartouches, i criyint yink après l'ôte les soubricots d' viadje à viadje. Les cîs d' Grêde criyint : Bîvî, Bîvot, Pèlé mitchot, Pèlé gadot. Les cîs d' Bîve ruspondint : Grêdî, Grêdwa, panse d'apwa, rond tchenê, cu d' pourcê. Ou cîs du Moncê : Canê du Moncê, canê d' pourcê. As cîs du Lwate : Con, con, canê du Lwate, Ta fame est mwate Dins 4 djoûs, t'a râre cate. Ah bin, et ké nouveles ? lu ciêr fêré. Èt âs cîs d' Nayômé : Cadet, Caget, Cadet !

Dju m' vas v' conter in pèrlinadje à Palijû.

- Zande !, dijot-ile in còp la mère Blossy, c'est vinrdi ki vint l'pèrlinadje à Sinte Scolastike à Palijû, pou les convulsions des afants..

Là don l' djoû arivé et kékes fames du Bîve s'ont rassan.né amon les Blossy pou vèy à kéne eure k'onz alot pârtu.

L' landmwin à matin, les vlà don arivées amon les Blossy avu les vwatures et les afants. Gn avot 8 û 9 fames k'ont démaré pou Palijû avu 6 landôs et 11 afants ddins. Iles les avint tous machîs, si bin k'i foutint ène vîye du tous les djâles, les pus fwârts monsmulint su les pus ptits et nin moyin du lzî fwêre atinde rêzon, don ! Ça fwêt k'ou dbout d'in moumint, les méres des pus ptits cmincint à wêtî d' crèsse les ôtes méres et pîs iles su promêtint bin d' dire leu vrê, âs cîes k'avint mètu les afants dins les vwatures à dmèrant ou viadje pask' iles n'avint nin l'timps d' couru jusk' à Palijû. Pa des còps, avu les gosses,

iles montint su ène tchèrète ki les ratrapot. C'est adon ku c'ére ène ahoulrêe su la tchèrète. Les fames glawinint tourtoutes, les djon.nes brayint et bin souvint les tchfâs s'awarint d' peur. Cand on passot dins in viadje, falot s'arêter pou fwêre bwâre les tchfâs, fwêre pichî les afants ( et pa des côps les mères). Pîs, on rdèmarot à bawiant d' pus bèle et souvint messe astot djà lon, cand iles arivint.

C'est dins l'èglîje k'i gn avot in boucan. Vous santèz bin, don, avu tous les afants ki tchûlint. Eureusmint ku l' curé î astot fwêt et k' i n' su sbarot pus d' rin. Cand l'ofrande arivot, bin souvint les gosses brayint d' pus bèle. Gn'avot k'avint fwêt dins leus drapês, des ôtes avint la culote frèche, des ôtes pichint dins les brès d' leu mère. Lu curé, loû, fjot pou in mî, à wêtant d'awè fwêt à pus vite. Adon, les fames rêchint pou s'fwêre agritchî al rêchûe du tchapistrê p' âs martchands d' mèdayes et d' ribans û bin l' colier èsprès pou les convulsions. Adon, iles rintrint co in côp à l'èglîje pou fwêre bèni co in côp leus gosses et les cayèts k'ile vunint d'achter.

Après ça, i n' dumèrot pus k'à mognî la marinde, rassan.ner les gosses et rampwinter lu tchmin pou ruvnu, bin eskintées cand iles rintrint ou viadje. Pus târd, avu l'trin, ça alot in pô mî.

Gaston LUCY

Rapontiyî pa Louwis Bêdjot, lu 28 Jwin 1999.